

**Zeitschrift:** Akzent : Magazin für Kultur und Gesellschaft

**Herausgeber:** Pro Senectute Basel-Stadt

**Band:** - (2011)

**Heft:** 5: Schwerpunkt : wir und Bundesbern

**Artikel:** Carl Miville-Seiler : Erinnerige vom en alt Ständeroot : zwai Halbkantöön - zwai Ständerööt

**Autor:** Miville-Seiler, Carl

**DOI:** <https://doi.org/10.5169/seals-842899>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use


The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 17.07.2025


**ETH-Bibliothek Zürich, E-Periodica, <https://www.e-periodica.ch>**

Carl Miville-Seiler: Erinnerige vom en alt Ständeroot

# Zwai Halbkantöön – zwai Ständerööt



Carl Miville-Seiler, Basel-Stadt



Edi Belser, Basel-Landschaft

Im wundervoll illuschierte groosse Buech «Mein Parlament», wo die aidgenessische Rööt ane 2006 iiber sich sälber uusegää hänn, schrybt dr Schriftsteller Pedro Lenz, iim syg bim Bsuech im Bundeshuus dr Nationalroot vorkoo wien e Gsamtschuel und dr Ständeroot wien en alphiloloogisch Gymnasium: oordlicher, sträbsaamer, braaver und droggener. Haisst das, d Ständerööt syyge die bessere Parlamäntarier? Si sinn vyllicht e bitz en Elite, well si alli in iirem Kanton emol en absoluti Meerhait gmacht hänn. Aber die Aigeschafte, won ene dr Pedro Lenz zueschrybt, sinn ganz aifach die disziplinierendi Wirggig vo dr glaine Zaal: 46 statt 200 wie im Nationalroot. Men isch perseenlig mee gforderet, au biobachtet und uffenander aagwiise. Men isch sich im glaine Grais neecher und loost uffenander: «Konstruktionswärgstatt anstatt Paukboode», wien ych däm amme gsait ha.

In däre Wärggstatt han ych zwelf Joor derfe schaffe, vo 1979 bis 1991, und y ha kenne Verglyych aa-stelle mit den andere Parlamänt, won y vorhär erläbt ha: Basler Grooss Rot und Nationalroot. In dr groosse Kammere spiile d Parteypolitik und wirtschaftliги Inträssen e wichtigi Rolle, Ständerööt versteen sich usserdäm au primär als Verdrätter vo kantonalen Aaliige. De Halbkantöön stoot im Ständeroot nummen ai Sitz zue. Nääbe mir het also alewyl e Landschäftler gwirggt, au är als «Ainzel-massgen» uss sym Kanton. Bsunders in Erinnerig bliiben isch mer d Partnerschaft mit em BL-Stän-

deroot Edi Belser vo 1979 bis 1987, won är drno Baselbieter Regierigsroot worden isch.

Dr Edi, 21 Joor jinger als ych, isch e gross politisch Talänt gsi und het in dr glaine Kammerie glyy e wichtigi Rolle gspüllt. Er isch aber au en Ooberbaselbieder – vo Lause – mit ere gsunde Skepsis gege z groossi und düüri Organisme, au was stedtisch Pro-jäggt und Finanzstruktuuren aagoot. Verschiidener Mainig gsi simmer in gwisze Gschäft im Beryych Landwirtschaft, är nadyyrlich eender uff dr Syte vo de Buuren und ych als Verdrätter vo stedtische Konsumäntepositioone. Sunscht hämmer mitenander kämpft und enander ghulfe, mer sinn jo au in dr glyyche Partey gsi. Y dängg jetz an Frooge vo dr Finanzpolitik und em Finanzuusglyyech zwische de Kantöön, an Gschäft im Raame vo dr Landesvertai-digung, wo dr Ooberscht Belser und dr Wacht-maischter Miville am glyyche Strigg zooge hänn, an Aaliige vom Flughaafe oder vom Rhyyhaafe, wo d Bedienig und d Tarif vo dr Baan zer Diskussion gstände sinn. Gäärn han y dr Edi au in sym Kampf fir dr Basistunnel uff dr Gotthardaxen understützt, won är als President vom Gotthardkomitee gfiert het. Aer het mi understützt bi myner Initiative: Voll-kantoon-Status für BS und BL. Myni baide andere BL-Ständerootskollege, dr Werner Jauslin vor und dr Profässer René Rhinow noon em Edi, will y doo nit vergässe. Au doo isch d Bezieig yywandfrey gsi, wenn au nit soo äng wie mit em Belser, well mer halt parteypolitisch nit uff dr glyyche Linie gsi sinn.